

*Kadaugan
labaw sa
Kamatayon*

R. B. THIEME, JR.

With permission of R. B. Thieme, Jr., Bible Ministries,
this publication is distributed in the Philippines
by Grace Logos Support Philippines, Inc.,
without charge or obligation.

For more information text or call:
*(Gihatag pinaagi sa GLSP nga walay bayad o obligasyon.
Para sa dugang pang kasayuran text o tawag:)*
Email: jersal1978@yahoo.com (Visayan)
Smart: 0998-845-2964 (Visayan)
Smart: 0908-236-1434 (Ilonggo)

The electronic version of this book can be read or downloaded
through the Internet address <https://www.gracelsp.ph>.
*(Ang elektroniko nga bersiyon niini nga libro mahimong mabasa o
mabalhin ang datos pinaagi sa Internet adres nga
<https://www.gracelsp.ph>.)*

KADAUGAN LABAW SA KAMATAYON

KAHUPAYAN TALIWALA SA KASUB-ANAN

R. B. THIEME, JR.



R. B. THIEME, JR., BIBLE MINISTRIES
HOUSTON, TEXAS

Kini usa ka hinashasan nga transkripto gikan sa usa ka sermon nga gitudlo 3 Pebrero 1991 ni Pastor R. B. Thieme, Jr., Berachah Church, Houston, Texas. Ang bibliyanhong mga doktrina nga gipasundayag sulud niini nga transkripto maangkon gikan sa R. B. Thieme, Jr., Bible Ministries.

Orihinal nga naimprinta isip *VICTORY OVER DEATH*

© 1991 ni R. B. Thieme, Jr. Tanang katungud gitagana.

Ikaupat nga impresyon 2020.

Kini nga basahon napatik gikan sa mga pakigpulong ug wa-imantala nga mga sinulat ni R. B. Thieme, Jr.

Sa pag-order niini nga libro sa English, kontak:

R. B. Thieme, Jr., Bible Ministries

P.O. Box 460829, Houston, Texas 77056-8829

www.rbthieme.org

Walay bahin niining publikasyon nga ipasanay o ipadala sa bisan unsang porma o sa bisan unsang pamaagi, elektroniko o mekanikal, lakip na ang seroks, rekord, o sa bisan unsang sistema sa pagtipig ug pag-abli sa impormasyon, nga walay nakasulat nga pagtugot gikan sa tigmantala.

Napatik sa Tagbilaran City, Bohol, Philippines, 2021.

Gihubad ngadto sa Binisaya nga pinulongan ni Jerome L. Salutan.

Gitan-aw pagbalik nila Amado D. Carejo, David C. Vicoy ug Raflyn H. Salutan.

Gipatik nga may pagtugot sa R. B. Thieme, Jr., Bible Ministries.

Kadaugan labaw sa Kamatayon

SA PAGPANGANDAM ALANG SA ATONG PAG-TOON sa Pulong sa Dios, usa ka hamubong panahon sa hilum nga pag-ampo.

Kami mag-isip niini nga usa ka pribilihiyo, Langitnong Amahan, sa pagbaton sa kagawasan ug sa oportunidad alang sa pagfellowship uban sa Pulong. Kami mapasalamaton nga kami nag-alagad Kanimo ingon nga

usa ka sinaligang nasod, ug kami magdawat sa responsibilidad sa mga magtotoo sulud sa usa ka sinaligang nasod. Busa kami nagkatigum sa among-kaugalingon sa pagkat-on sa Pulong sa Dios, sa pagtubo pinaagi sa grasya ug pinaagi sa kahibalo sa atong Ginoo ug Manluluwas, Jesu-Kristo. Kami maghinumdum niadtong kalakin-an ug kababayen-an nga kasundalohan gikan niini nga kongregasyon kinsa niining-tungura nag-alagad diha sa armadong-kusog. Kami mapasalamaton alang sa kama-tuuran nga sila andam sulud sa ilang mga kalag sa pagtuman sa ilang responsibilidad diha sa sundalohong pangalagad. Kami mangamuyo alang sa ilang luwas nga kahimtang ug alang sa oportunidad nga anaa kanila sa pagsaksi alang kang Jesu-Kristo taliwala sa ilang mga sirkumstansiya. Samtang kami magtoon sa Pulong

sa Dios, kami mag-ampo nga ang Dios nga Balaang Espiritu mosukna kanamo. Kay kami mangamuyo niini sa ngalan ni Kristo. Amen.

Niadtong 1990, ang R. B. Thieme, Jr., Bible Ministries mimantala sa *Usa ka Butang Mahitungud sa Kinabuhi ug Kamatayon*, usa ka polyeto sa maayong-balita nga gidesinyo alang sa mga dimagtotoo. Kini nga polyeto nakasinati og talagsaong pagtubag labot sa Gulf War ug kami nakadungog sa daghang maanindot nga mga asoy diha sa iyang impak.

Karong bag-o ako miadto sa lugar sa Los Angeles alang sa usa ka komperensiya, ug ang *Los Angeles Times* (29 Enero 1991, panid H-2) adunay usa ka hulagway sa usa ka tripulante nga nagbasa og usa ka libro ibabaw sa usa ka tangke-iggugubat nga nalintuwad. Ang kapsiyon sa ubus mabasa, "Army Pfc. Robert McCann nga Taga-Butte, Montana, nagaapas sa iyang

angay-basahon samtang siya nagapahulay ibabaw sa tiyan sa usa ka M-1A1 tangke-iggugubat nga nabali samtang kini gikarga ngadto sa usa ka bagon. Ang libro, giulohan og *Usa ka Butang Mahitungud sa Kinabuhi ug Kamatayon*, gihatag ngadto kaniya sa usa ka tsaplin.”

Pipila ka gatos sa batan-ong kalakin-an ug kababayen-an gikan niini nga kongregasyon sulud sa nagkalainlain nga sundalonghong mga pangalagad misilbi sa Operation Desert Storm. Usa niining batan-ong kalakin-an mitugyan sa iyang kinabuhi alang sa iyang nasod ug karon anaa sa atubangan sa Ginoo. Ang iyang pagkawala mamahimong usa ka pahinumdom alang sa usa ka importanteng prinsipyo mahitungud sa lawasnong kamatayon.

ANG DOKTRINA SA LAWASNONG KAMATAYON

*Mga Kategoriya sa mga Kapilian ug sa
mga Alternatibo sa Kinabuhi*

KAPILIAN #1. Ang unang kapilian sa kinabuhi mao ang pagtoo diha ni Jesu-Kristo alang sa waykatapusang kaluwasan. Sa dihang ang atong Ginoong Jesu-Kristo anaa sa krus, Siya gihukman alang sa mga sala sa kalibutan. Ang tanang sala nga nabuhat gayud sulud sa kasaysayan sa tawhanong kaliwat giimpyut ngadto Kaniya ibabaw sa krus ug gihukman.

Ang Dios nagapadayag sa Iyang gugma ngari kanato, tungud kay bisan og kita mga makasasala pa, si Kristo namatay isip usa ka puli alang kanato. (Mga Taga-Roma 5:8)

Ang Dios nahigugma sa kalibutan pag-ayo tungud kay Siya mitugyan sa Iyang Anak, ang bugtong natawo nga waykapa-rehas, aron ang bisan-kinsa nga nagatoo diha Kaniya dili gayud malaglag, kundili makabaton sa waykatapusang kinabuhi. (Juan 3:16)

Kini nga kapilian mao ang pagtoo diha ni Jesu-Kristo alang sa waykatapusang kaluwasan. Si bisan-kinsa makabaton og waykatapusang kinabuhi diin ikahatag sa Dios diha sa takna sa pagtoo kang Kristo pinaagi lamang sa pagtoo diha Kaniya. Ang panig-ingnan alang sa pagtoo gihatag diha sa Juan 1:12.

Apan taman sa mitoo Kaniya [nagdawat ni Kristo ug sa Iyang nagluwas nga buhat isip usa ka gasa], ngadto kanila Siya mihatag

og katungud nga mamahimong mga anak sa Dios, hasta gani niadtong kinsa magtoo diha sa Iyang ngalan. (Juan 1:12)

Kini nga pagtoo mao ang pagdawat sa usa ka gasa. Ang pagtoo dili usa ka sistema sa dedikasyon o sa bisan-unsang matang sa buluhaton bahin sa usa ka tawo. Pagtoo mao ang pagdawat sa usa ka gasa—usa ka gasa nga kita dili takus ug kita dili angayan.

Ang alternatibo sa pagtoo diha ni Kristo alang sa waykatapusang kinabuhi mao ang waykatapusang paghukum. Ang Juan 3:36 ug 3:18 mag-ingon:

Siya nga nagatoo diha sa Anak adunay waykatapusang kinabuhi; apan siya nga wala nagatoo dili makakaplag sa kinabuhi, apan ang kaligutgut sa Dios nagapabilin diha kaniya. (Juan 3:36)

Siya nga nagatoo diha sa Anak dili mahukman; apan siya nga wala nagatoo hinukman na, tungud kay siya wala mitoo diha sa waykaparehas nga Anak sa Dios. (Juan 3:18)

Ang unang kategoriya sa mga kapilian ug sa mga alternatibo mao ang waykatapusang kaluwasan o waykatapusang paghukum. Ang kapilian: Pagtoo diha ni Kristo alang sa waykatapusang kinabuhi. Ang alternatibo: Pagsalikway ni Kristo ug pag-antos sa waykatapusang pagsilot.

KAPILIAN #2. Ang ikaduhang kapilian sa kinabuhi maoy alang sa magtotoo sa pagtuman sa plano sa Dios pinaagi sa pagkat-on, paghunahuna, ug paggamit sa doktrina sa Bibliya. Kini nga kapilian naga-kinahanglan og adlaw-adlaw nga mga desisyon sa paghimo sa doktrina sa Bibliya nga numero unong prayoridad diha sa ki-

nabuhi.

Ang alternatibo sa pagtuman sa plano sa Dios mao ang kinabuhi sa kagul-anan alang sa magtotoo. Kini nga kaugalingong-minugna nga kagul-anan maykalambigitan ngadto sa mga dinugtongdugtong nga emosyonal ug kaarogante sa mga sala ug gipaila pinaagi sa pagkasubhetibo, pagkalibog, kawalay-kasegurohan, ug kahigawad. Ang resulta bisan-hain sa Kristohanong moral o imoral nga pagkaut-ut, o pagbalhinbalhin tali sa duha.

Kining ikaduha nga kategoriya sa mga kapilian ug sa mga alternatibo maykalambigitan ngadto sa Kristohanong paagi sa kinabuhi. Ang kapilian: Pagtuman sa plano, pagbuut, ug katuyoan sa Dios alang sa imong kinabuhi ug pag-ambit sa kalipay sa Dios. Ang alternatibo: Pagsalikway sa plano sa Dios ug pagpuyo sa usa ka miserableng kinabuhi.

KAPILIAN #3. Ang ikatulong kapilian may-

kalambigitan sa kamatayon. Ang kapilian sa mapuslanong pagkamatay nahimong posible tungud kay Dios ang nagabuut sa oras, sa paagi, ug sa dapit sa atong kamatayon, sama sa gipahayag ni Apostol Pablo.

Alang kanako, pagkinabuhi maoy Kristo, ug pagkamatay maoy ganansiya. (Mga Taga-Filipos 1:21)

Ang alternatibo alang sa mapuslanong pagkamatay mao ang pagkamatay ubus sa kinatas-ang divine nga disiplina ubus sa prinsipyo sa sala paingon sa kamatayon nga gihisgotan diha sa 1 Juan 5:16.

Adunay usa ka sala nga nag-sangko ngadto sa kamatayon; ako wala magsulti nga siya gayud maghangyo alang niini. (1 Juan 5:16b)

Sa bisan-haing kahimtang, bisan kon ang magtotoo usa ka mananaog (usa kinsa nagatuman sa plano sa Dios) o usa ka pildiro (usa kinsa napakyas sa pagtuman sa Iyang plano), ang kamatayon sa magtotoo maoy kadaugan sa Dios sa kanunay.

Kamatayon Maoy Kadaugan sa Dios

Ang kamatayon sa matag magtotoo diha ni Jesu-Kristo mao ang labawng-kamandoan nga desisyon sa Dios. Sulud sa atong tibuuk-kinabuhi kita maghimo og daghang desisyon. Ang uban maayong mga desisyon gikan sa usa ka posisyon sa kalig-on, ug ang uban dimaayong mga desisyon gikan sa usa ka posisyon sa kahuyang. Apan, kon kini panahon na alang sa magtotoo nga mamatay, ang kamatayon sa mananaog o pildiro sa kanunay maoy desisyon sa Dios. Ang pagkapildiro wala nagakahulugan og pagkawagtang sa kaluwasan, kundili ang

pagkawagtang sa espesyal nga mga panalangin sulud sa panahon ug sulud sa eternidad. Sa bisan-hain nga kahimtang, ang kamatayon maoy kadaugan sa Dios alang sa mananaog o sa pildiyo diha sa Kristohanong kinabuhi. Ang 1 Mga Taga-Corinto 15:55 nagasukna:

“O kamatayon, asa man ang imong kalala? O lubnganan, asa man ang imong kadaugan?” (1 Mga Taga-Corinto 15:55)

Ang tubag gihatag diha sa bersikulo 57:

Salamat sa Dios, kinsa nagahatag ngari kanato sa kadaugan pinaagi sa atong Ginoong Jesu-Kristo. (1 Mga Taga-Corinto 15:57)

Ang mananaog, o ang magtotoo kinsa nagatuman sa plano sa Dios, adunay labing talagsaon nga kinabuhi ibabaw niining ka-

libutana, ug kinatas-ang panalangin usab sa pagkamatay. Diha sa Mga Taga-Filipos 1:20–21, si Apostol Pablo nagaingon,

Pinasikad sa akong masaligong pagdahum ug paglaum, nga ako dili mabutang sa kaulawan sa bisan-unsang-paagi [mao ang, bisan-unsang-paagi sa kinabuhi o sa kamatayon], apan uban sa tanang kasibot, si Kristo, bisan karon, ingon sa kanunay, mahimaya sulud sa akong lawas, bisan kon sa kinabuhi o bisan kon sa kamatayon. Alang kanako, pagkinabuhi maoy Kristo [okupasyon uban sa persona ni Kristo], ug pagkamatay maoy ganansiya. (Mga Taga-Filipos 1:20–21)

Unsa man ang pasabut niining mga bersikuloha? Sa unsang-paagiha ang pagkamatay mahimong ganansiya? Kon ang

pagkinabuhi maoy okupasyon uban sa persona ni Kristo, ug ang pagkamatay maoy pagkawala gikan sa lawas ug anaa sa atubangan uban sa Ginoo (2 Mga Taga-Corinto 5:8), nan ang pagkamatay mahimo lamang nga labi pang maginansiyahon kay sa pagkinabuhi.

Diha sa pagkinabuhi nga bahin sulud sa plano sa Dios, ang empasis anaa diha sa kabubut-on sa magtotoo labot sa pagtubag ngadto sa doktrina sa Bibliya ug sa kinabuhi ubus sa palisiya sa grasya sa Dios. Diha sa pagkamatay nga bahin sulud sa plano sa Dios, ang empasis anaa diha sa kinalabwang-kamandoan sa Dios ug sa Iyang palisiya sa grasya. Busa, Dios ang nagabuut sa oras sa kamatayon sa magtotoo. Kini Iyang desisyon. Dios ang nagabuut sa paagi sa kamatayon sa magtotoo. Kana, sa ingon-usab, Iyang desisyon. Ug Dios ang nagabuut sa dapit sa kamatayon sa magtotoo. Kana, usab, Iyang desisyon. Busa, ang kamatayon kadaugan sa Dios.

Salamat sa Dios, kinsa nagahatag ngari kanato sa kadaugan pinaagi sa atong Ginoong Jesu-Kristo. (1 Mga Taga-Corinto 15:57)

Sa dihang si Job nakadungog bahin sa kamatayon sa iyang mga anak, siya miingon,

“Ang GINOO mihatag [kalagnong kinabuhi ngadto sa biyolohiyang kinabuhi diha sa lawas-nong pagkahimugso], ang GINOO nagakuha [ang Ginoong nagabulag sa kalag gikan sa biyolohiyang kinabuhi diha sa lawas-nong kamatayon]. [Ug unya unsa man ang konklusyon ni Job?] Da-layegon ang ngalan sa GINOO.” (Job 1:21*b*)

Ug ang konklusyon sa Salmo 116:15:

Bililhon diha sa panan-aw sa GI-
NOO ang kamatayon sa Iyang mga
santo. (Salmo 116:15)

“Mga santo” nagapasabut sa tanang mag-
totoo—mga mananaog o mga pildi-ro. Busa,
diha sa kamatayon:

Ang Dios mopapas sa tanang
luha gikan sa ilang mga mata;
ug wala na gayuy bisan-unsang
kamatayon pa; wala na gayuy
bisan-unsang pagbangutan pa,
o paghilak, o kasakit; kay ang
karaang mga butang natapos na.
(Pinadayag 21:4)

Uban niining ikaduha nga konsepto sa
kamatayon isip kadaugan sa Dios, kita mag-
langkub sa unum ka prinsipyo labot sa ka-
daugan sa Dios labaw sa kamatayon.

PRINSIPYO #1. Ang kamatayon sa magtotoo maoy desisyon sa Dios. Busa, ang lawasnong kamatayon sa magtotoo kada-ugan sa Dios.

PRINSIPYO #2. Ang divine nga desisyon mahitungud sa kamatayon sa magtotoo nagalakip sa oras, sa paagi, ug sa dapit sa kamatayon. Busa, wala gayuy maka-tangtang sa magtotoo gikan niining kinabu-hia hangtod ang Dios nagahukum.

PRINSIPYO #3. Tungud kay ang Dios perpekto, ang Iyang pagtakda maoy perpekto diha sa tanang butang mahitungud sa kinabuhi ug kamatayon sa magtotoo.

PRINSIPYO #4. Tungud kay ang kamatayon sa magtotoo usa ka maalamon ug maloloy-ong desisyon sa Dios, walay usa ang adunay katungud sa pagsukna sa perpektong kaalam sa Dios labot sa bisan-unsang butang.

PRINSIPYO #5. Wala sa makasaysayanon ni kinaiyanhong kalit-nga-kalisdanan, wala sa pakiggubat ni terorismo, ang makatangtang sa magtotoo gawas sa divine nga pagtugot.

PRINSIPYO #6. Busa, kita nga nahabilin wala gayuy katungud sa pagsukna sa kaalam, sa hustisya, sa grasya, o sa pagtakda sa Dios labot sa kamatayon sa usa ka minahal.

Ang Eksepsiyon sa Pagkamatay nga Grasya

Ang eksepsiyon sa lawasnong kamatayon sa magtotoo mao ang pagkabanhaw, gitawag diha sa teyolohiya og Pagsakgaw sa Simbahan.

Ang Ginoo Mismo mokanaog gikan sa langit uban sa usa ka sing-

git, sa tingog sa arkanghel, ug sa trumpeta sa Dios; ug ang mga patay diha ni Kristo mabanhaw pag-una. Unya kita nga mga buhi ug mahibilin magaapas uban kanila ngadto sa kapanganoran alang sa pagtagbo sa Ginoo taliwala sa kahanginan, ug aron nga kita sa kanunay makig-uban sa Ginoo. (1 Mga Taga-Tesalonica 4:16–17)

Ang Pagsakgaw sa Simbahan nagkaduul. Wala gayuy propesiya nga matuman sa dili pa ang Pagsakgaw mahitabo. Walay usa ang nasayod sa takna sa Pagsakgaw, nga mahimong mahitabo karong-adlaw, ugma, o bisan-unsang orasa sulud sa haduul o sa halayo nga umaabot. Hinoon, kining usa ka henerasyon sa mga magtotoo dili mosinati og lawasnong kamatayon kundili modawat sa ilang mga lawas sa pagkabanhaw gawas sa pagkamatay.

Deskripsiyon sa Kamatayon alang sa Magtotoo

Ang deskripsiyon sa lawasnong kamatayon nagalakip sa walo ka hiyas alang sa magtotoo diha ni Jesu-Kristo.

HIYAS #1. Tungud kay ang kamatayon maoy kadaugan sa Dios, ang lubnganan nawad-an sa iyang kalala.

“O kamatayon, asa man ang imong kalala? O lubnganan, asa man ang imong kadaugan?” (1 Mga Taga-Corinto 15:55)

Salamat sa Dios, kinsa nagahatag ngari kanato sa kadaugan pinaagi sa atong Ginoong Jesu-Kristo. (1 Mga Taga-Corinto 15:57)

HIYAS #2. Kamatayon nagapasabut og

walay alatubangon nga paghukum.

Gumikan kay kini natagana alang sa katawhan nga mamatay, apan sunud niini nga kamatayon usa ka buhat sa paghukum; tungud-niini si Kristo gisakripisyo sa makausa alang sa pagtangtang sa mga sala sa mga tawo, ug Siya mopakita sa ikaduhang higayon, dili sa pag-antos sa mga sala, kundili sa pagdala sa kalingkawasan alang niadtong kinsa nagpaabot Kaniya. (Mga Hebreohanon 9:27–28)

Adunay usa ka alatubangon sunud sa kamatayon mahitungud sa paghukum alang sa dimagtotoo. Apan kana nga alatubangon nakansilar labot sa magtotoo diha ni Ginoong Jesu-Kristo.

Wala gayuy paghukum, tungud-niini, alang niadtong kinsa anaa

ni Kristo Jesus. (Mga Taga-Roma
8:1)

HIYAS #3. Alang sa magtotoo diha ni Jesu-Kristo, ang kamatayon nagakahulugan og dakong panalangin ngadto sa langit sa dili pa ang pagkabanhaw o Pagsakgaw mahitabo. Diha sa 2 Mga Taga-Corinto 5:8, kita gikaingon nga,

Pagkawala gikan sa lawas apan anaa sa atubangan diha sa Ginoo. (2 Mga Taga-Corinto 5:8*b*)

Ang pangdugtongang pulongan nga “anaa sa atubangan diha sa Ginoo” nagapasabut sa usa ka kasamtangang lawas samtang kita maghulat alang sa pagkabanhaw. Kita matipon uban sa mga minahal kang kinsa kita makaila human sa pagpanaw gikan niining kinabuhia. Ang lawasnong kamatayon usab gihulagway ingon nga pagkawala sa mga trahedyas ug mga kalit-

nga-kalisdanan sa kinabuhi.

Ang Dios mopahid sa tanang luha gikan sa ilang mga mata; ug wala na gayuy bisan-unsang pang kamatayon; wala na gayuy bisan-unsang pang pagbangutan, o paghilak, o pagsakit; kay ang karaang mga butang natapos na. (Pinadayag 21:4)

HIYAS #4. Ang lawasnong kamatayon alang sa magtotoo nagakahulugan og usa ka bag-ong pinuy-anan sa langit. Si Jesus miingon diha sa Juan 14,

“Ayaw tugoti inyong kasingkasing nga mahasol; kamo too diha sa Dios, too usab Kanako. Sa pinuy-anan sa Akong Amahan adunay daghang mansiyon; kon kini dili tinuud, Ako magasulti gayud kaninyo; Ako moadto sa pag-andam

og usa ka pinuy-anan alang kaninyo. Ug kon Ako moadto sa pag-andam og usa ka pinuy-anan alang kaninyo, Ako moanhi pag-balik, ug magdawat kaninyo sa Akong-kaugalingon; diin asang-dapita Ako, didto malagmit usab kamo.” (Juan 14:1–3)

Si maduhaduhaong Thomas miingon,

“Ginoo, kami wala masayod asang dapita Ikaw moadto; ug unsaon nga kami makahibalo sa agianan?” Ug si Jesus miingon kaniya, “Ako ang dalan, ang kamatuuran, ug ang kinabuhi; walay usa ang makaduul ngadto sa Amahan, kundili pinaagi Kana-ko.” (Juan 14:5–6)

Ang lawasnong kamatayon nagakahulugan og paghuput sa usa ka maanindot nga bag-

ong pinuy-anan. Bisan-unsang matanga imong mahimong pinuy-anan dinhi, ikaw makaangkon og usa ka mansiyon didto sa langit.

HIYAS #5. Ang lawasnong kamatayon alang sa magtotoo diha ni Jesu-Kristo nagakahulugan og pagpaabot didto sa langit alang sa atong waykatapusang panulundon.

Dalayegon ang Dios gani ang Amahan sa atong Ginoong Jesu-Kristo, nga pinasikad sa Iyang dakong kalooy nakapahimo kanato nga matawo pag-usab alang sa usa ka buhing paglaum pinaagi sa pagkabanhaw ni Jesu-Kristo gikan sa mga patay, alang sa usa ka panulundon nga lunsay ug putli ug nga dili mahanaw, gitagana didto sa langit alang kaninyo, nga giampingan sa gahum sa

Dios pinaagi sa pagtoo ngadto sa kaluwasan nga andam aron ikapadayag diha sa katapusang panahon. (1 Pedro 1:3–5)

Kita magpaabot uban sa hingpit nga kalipay human sa kamatayon alang sa atong panulundon.

HIYAS #6. Alang sa magtotoo diha ni Jesu-Kristo, ang lawasnong kamatayon maoy hingpit nga katumanan sa waykatapusang kinabuhi. Diha sa Juan 10:28, ang atong Ginoo misulti niadtong kinsa magtoo diha Kaniya,

“Ako maghatag ngadto kanila sa waykatapusang kinabuhi, sila dili gayud mangalaglag; walay si bisan-kinsa ang makasakmit kanila gikan sa Akong kamut.” (Juan 10:28)

HIYAS #7. Kamatayon nagakahulugan nga ang magtotoo nagapaabot didto sa langit alang sa pagkabanhaw. Ang atong Ginoo misulti ngadto ni Martha didto sa lubnganan ni Lazarus:

Si Jesus miingon kaniya, “Ako ang pagkabanhaw ug ang kinabuhi; siya nga nagatoo Kanako mabuhi bisan pa kon siya mamatay, ug siya nga buhi ug nagatoo Kanako dili gayud mamatay.” (Juan 11:25–26a)

HIYAS #8. Ang kamatayon wala nagapabulag sa magtotoo gikan sa Dios.

Kay ako naawhag nga walay kamatayon, ni kinabuhi, ni mga anghel, ni hut-ong sa mga anghel, ni mga butang karon, ni mga butang sa umaabot, ni mga gahum, ni gi-habogon, ni giladmon, ni bisan un-

sang binuhat, ang makapabulag kanato gikan sa gugma sa Dios, nga anaa ni Kristo Jesus atong Ginoo. (Mga Taga-Roma 8:38–39)

Kita . . . nawala gikan sa lawas apan anaa sa atubangan diha sa Ginoo. (2 Mga Taga-Corinto 5:8b)

Ug sa makausa pa sa Pinadayag 21:4:

Ang Dios mopahid sa tanang luha gikan sa ilang mga mata; ug wala na gayuy bisan-unsang pang kamatayon; wala na gayuy bisan-unsang pang pagbangutan, o paghilak, o pagsakit; kay ang karaang mga butang natapos na. (Pinadayag 21:4)

Aplikasyon sa mga Prinsipyo alang sa Buhi

Adunay unum ka prinsipyo sa aplikasyon alang sa mga buhi, alang niadtong kinsa mahibilin.

PRINSIPYO #1. Ang kamatayon sa usa ka minahal o sa bililhong higala dili makapahunong sa kasaysayan. Ang kinabuhi kinahanglan magpadayon alang sa mga buhi.

PRINSIPYO #2. Kita dili makahunong sa normal nga pagkinabuhi tungud kay ang atong mga minahal namatay ug miadto sa langit.

PRINSIPYO #3. Atong hinumduman gayud nga kadtong kinsa atong gimahal nga nauna kanato sa langit adunay masdako pa kaayong panalangin ug kalipay didto sa langit kay sa atong mahibaloan gayud o

masinati niining kinabuhia.

PRINSIPYO #4. Busa, kita dili gayud masilag sa uban kinsa daw og naghudyaka samtang kita magbangutan ug magsubo sa nahanaw nga mga minahal.

PRINSIPYO #5. Kita dili makabungat sa atong kahigalaan aron sila mohunong sa pagkinabuhi ug moduyog kanato diha sa waykinutubang pagbangutan ug kagulan.

PRINSIPYO #6. Ang kahigalaan mopahayag sa kalooy ug simpatiya atol sa paglubong o lubnganan. Apan, human sa paglabay sa panahon, daw walay usa nagahatag sa pagtagad, ug daw wala nay usa nga nakahinumdom.

Ikaw tingali mangutana: Kini ba makiangayon? Ang tubag: Oo. Ngano man nga kini makiangayon? Tungud kay ang imong

kahupayan taliwala sa panahon sa kagulangan ug kasub-anan kinahanglan maggikan sa Ginoo. Kini nagakahulugan nga ang tinuud nga tinubdan sa imong kahupayan mao ang doktrina sa Bibliya.

Tungud kay ikaw sa laktod nahilambigit diha sa kamatayon sa usa ka minahal, ang imong kagulangan ug kasub-anan tingali magpadayon sulud sa imong tibuuk-kinabuhi. Apan ikaw magpalingkawas gayud sa imong kahigalaan sa pagpadayon diha sa pagkinabuhi. Ang imong kalipay ug kahupayan kinahanglan maggikan sa doktrina sa Bibliya. Hinumdumi, pinaagi sa kamatayon ang imong mga minahal makasulud sa usa ka dapit sa hilabihan, kadako pa kaayong kalipay ug panalangin kay sa imong masinati gayud ibabaw niining kalibutana.

Uban sa imong kasub-anan ikaw sa ingon-usab modala sa alimyon sa mga panumduman. Uban niana nga alimyon ikaw dili gayud masilag sa kalipay ug sa

katawa niadtong kinsa magpadayon diha sa pagkinabuhi. Ikaw, usab, magpadayon gayud diha sa pagkinabuhi, diin nagakahulugan nga ang imong kagulan usa ka pribadong hitabo tali kanimo ug sa Gino. Ang imong pag-inusara taliwala sa kagulan ug kasub-anan nahisakup sa imong kaugalingon; ang imong alimyon sa mga panumduman nahisakup sa imong kaugalingon; ang imong kahupayan gikan sa doktrina sa Bibliya sulud sa imong kalag nahisakup sa imong kaugalingon; ang imong kasigurohan ug kalinaw nga ang imong mga minahal anaa didto sa langit nahisakup sa imong kaugalingon.

Unsa ang wala mahisakup kanimo mao ang pagkamapait, pagdumut, kasuko, kasilag ngadto sa uban—alang niadtong kinsa daw walay pagtagad o alang niadtong kinsa wala manginlabot diha sa kamatayon sa imong mga minahal. Ikaw wala magpasidungog sa atong Ginoong Jesu-Kristo o sa mga patay diha ni Kristo kon ikaw

mahimong abnormal diha sa imong kagulangan, o magpalungtad sa imong kasubanan hangtod sa punto sa pagkasakit sa pangisip. Ang doktrina sa Bibliya sulud sa imong kalag nagahatag kanimo sa espirituhanong katakus sa paglahutay. Ang doktrina sa Bibliya sulud sa imong kalag nagahatag kanimo sa espirituhanong katakus ug panahum alang sa pagmaya tungud kay ang imong mga minahal anaa uban sa presensiya sa Ginoo, ug didto ikaw sa umaabot nga panahon mouban kanila. Tungud niana ang 1 Mga Taga-Tesalonica 4:13 nagaingon,

Apan kami dili buat nga kamo mahimong ignorante, kaigsoonan, mahitungud niadtong kinsa nahikatulog [ang katulog dinhi usa ka katangdian sa Kristohanong kamatayon nga may empasis sa pagmata sulud sa usa ka lawas sa pagkabanhaw], aron nga kamo dili magbangutan, sama sa

uban kinsa wala makabaton og paglaum. (1 Mga Taga-Tesalonica 4:13)

Ang “uban kinsa wala makabaton og paglaum” nagapasabut sa mga dimagtotoo. Waysapayan ang hinungdan sa kamatayon, waysapayan ang makapakugang nga kalisang ug trahedya, ang kamatayon sa kanunay maoy desisyon sa Dios.

Aplikasyon sa mga Prinsipyo Maykalabutan sa Dios

Samtang ang magtotoo makakontrolar ngadto sa iyang kinabuhi diha sa pagtuman sa plano sa Dios, siya dili makakontrolar mahitungud sa oras, sa paagi, o sa dapit sa iyang kamatayon. Tungud-niini, adunay pito ka aplikasyon sa mga prinsipyo nga maykalabutan sa Dios.

PRINSIPYO #1. Ang kamatayon sa magtotoo usa ka butang sa kinalabwang-kamandoan, integridad, ug kaalam sa Dios. Busa, ang kamatayon dili gayud nato mapugngan sa hingpit.

PRINSIPYO #2. Ang Dios perpekto; busa, ang Iyang kaalam perpekto.

PRINSIPYO #3. Ang Dios omniscient; Siya nasayod sa tanang panghitabo diha sa kamatayon sa matag magtotoo. Binilyon sa katuigan ang miagi didto sa eternidad nga milabay ang omniscience sa Dios nahibalo sa tanang kamatuuran sa matag hitabo ug, tungud-niini, ang Dios nagapili sa perpektong panahon, ang tukmang panahon—dili gayud dali kaayo, ug dili gayud dugay kaayo.

PRINSIPYO #4. Ang Dios perpekto hangtod sa hangtod; tungud-niini, ang tanan sa Iyang labawng-kamandoan nga mga de-

sisyon perpekto. Kini ang hinungdan nga diha sa hitabo sa atong pagkamatay ang kinalabwang-kamandoan sa Dios nagapuli sa atong kabubut-on.

PRINSIPYO #5. Tanang desisyon gikan sa kinalabwang-kamandoan sa Dios nahimo pinaagi sa perpektong kaalam ug integridad, naglakip sa Iyang mga desisyon diha sa oras, paagi, ug dapit sa kamatayon alang sa matag magtotoo diha ni Jesu-Kristo.

PRINSIPYO #6. Ang kamatayon sa matag magtotoo diha ni Jesu-Kristo sa kanunay usa ka butang sa grasya ug kaalam sa Dios. Busa, ang kamatayon sa magtotoo maoy kadaugan sa Dios, bisan kon kana nga magtotoo usa ka mananaog o usa ka pildiro diha sa Kristohanong kasinatian.

PRINSIPYO #7. Gumikan kay ang Dios dimausab, ug adunay waykatapusang personal nga gugma alang sa matag magtotoo,

kini imposible alang sa Dios sa pagbuhat sa bisan-unsang-butang nga sukwahi diha sa Iyang gugma alang kanato. Busa, ang kamatayon sa matag magtotoo usa ka ekspresyon sa perpektong gugma sa Dios alang sa matag usa kanato, walay sapayan unsang-paagiha kita mamatay—ang paagi sa kamatayon, ang oras sa kamatayon, o sa lain pang hinungdan. Ang Dios perpekto; Siya dimausab; Siya adunay personal nga gugma alang sa matag magtotoo. Ang Iyang gugma dili gayud maapektohan tungud sa atong mga kapakyasan o mga kalampusan sulud sa atong espirituhanong kinabuhi. Kini imposible alang sa Dios sa pagbuhat sa bisan-unsang-butang nga sukwahi diha sa Iyang gugma alang kanato.

Ang kamatayon sa magtotoo usa ka ekspresyon sa gugma sa Dios alang sa matag usa kanato. Kana ang labing-mahinungdanong aplikasyon diha sa kamatayon ni bisan si kinsa kita maghigugma ug diha sa atong kaugalingon nga kamatayon

sa higayon nga ang Dios nagahukum sa ingon.

“F” ALANG KANG FREDDIE

Si Charles Frederick McIntosh ang akong kinaunhan nga Kristohanong higala human ako nahimong usa ka magtotoo ug usa sa akong kinasuuran nga mga higala sa kinabuhi. Ang bugtong panahon nga kami nagkalagyo sa dihang siya miadto sa UCLA ug ako miadto sa Unibersidad sa Arizona, apan kami magkakita sa usag-usa panahon sa ting-init. Ako mibantay-sa-malumos didto sa Catalina Island ug siya mitrabaho sa dili halayo mao nga kami magkakita sa usag usa makanunay.

Siya usa ka labing dalaygon nga magtotoo. Iyang espirituhanong gasa ang pastor-magtutudlo. Ako wala gayud makadungog ni bisan-kinsa nga misangyaw sa ingon ka kahibulungan-kaayong paagi. Daghan

kaayong katawhan manglingkod gayud ug maminaw sa matag higayon siya mihatag og usa ka testimonya o mihatag og usa ka mensahe bahin sa doktrina sa Bibliya. Siya talagsaon.

Sa dihang ang Gubat sa Kalibutan II mi-abut ako nangalagad nang daan isip usa ka opisyal dul-an sa usa ka tuig. Si Freddie bag-ohay lang migraduwar sa UCLA ug mipil sa Air Force diin siya nahimong usa ka kadete sa pagpalupad og ayroplano. Human sa iyang paggraduwar si “F” alang kang Freddie gipadala ngadto sa Europe. Sa iyang pagpanaw, si Freddie mihapit sa kuwartel diin ako nagserbisyo niadtong tungura alang sa pagpanamilit. Usa sa katapusang mga butang nga akong gisulti ngadto kaniya mao ang, “Freddie, ikaw mobalik uban sa kinadaghanang koleksiyon sa mga ilustrasyon gayud alang sa imong maayo-kaayong ministeryo dinhi niining nasora human sa gubat.”

Buyno, si Freddie wala mahibalik. Ang

iyang ikabaynte-singko nga misyon mao ang iyang katapusan nga misyon. Ako nahinumdom sa mga sulat nga gisulat ni Freddie, dili mahitungud sa iyang pagkabayani, bisan pa og siya nag-unang pinasidunggan, kundili mahitungud niadtong kalakin-an kang kinsa siya mialagad. Siya mihangyo kanako sa pag-ampo alang sa mga myembro sa iyang tripulante. Siya ang piloto sa usa ka B-17 nga may napulo ka tripulante. Ako nahinumdom sa dihang si Freddie misulat alang sa pagsulti kanako sa kinaunhang tawo nga nakadawat ni Kristo. Akong pagtoo ang iyang nabigador maoy kinaunhan, sunud ang tigpamomba, unya ang tigmasinggan, ug uban pa. Ang iyang katapusang sulat miabut kanako sa wala pa gayud siya mibiya alang sa iyang ikabaynte-singko nga misyon, sa pagkompirmar nga ang matag usa sa iyang tripulante sa ayroplano usa ka magtotoo diha ni Jesu-Kristo.

Isip sangputanan sa ikabaynte-singko

nga misyon ngadto sa Berlin, ang toongbahin sa mga makina naigo sa armas. Si Freddie nadaotan sa iyang mga makina, ug siya sa kinamut nga nagpugong sa B-17 sa pagpahiluna aron nga ang iyang tripulante makaambak. Sa dihang siya mihatag sa mando sa pag-ambak, ang nabigador nangutana, “Ikaw ba mouban kanamo?” Ug si Freddie mitubag, “Mouban ako kon mahimo nako.” Ang tanan miambak. Ang nabigador kinsa maoy kinaulahiing tawo sa pagbiya mihangad. Human ang iyang parakayda miabli siya mihangad pagbalik ug nakita si “F” alang kang Freddie, di ba nahibilin sa ayroplano, ug unya sa kalit usa ka dakong pagbuto. Si Charles Frederick McIntosh mibiya paingon sa eternidad.

Sa dihang ako nakadawat og balita sa kamatayon ni Freddie ako nakugang. Siya ang usa ka tawo nga makabaton unta gayud og usa sa kinadak-ang human-sagubat nga mga ministryo sa bisan-kinsa nga akong nailhan. Apan ang Ginoo miisip

nga angay kadtong higayona sa pagpapauli ni Freddie.

Ako wala makabaton niini nga kasayuran nga inyong maangkon karon ug, tungud-niini, ako nakasinati og pipila ka malisud nga mga panahon tungud sa iyang kamatayon. Sulud sa hataas nga panahon human-niadto, ilabina kon ako anaa sa trabaho sulud sa Air Force sa laing-dapit, sa halawum nga kagabhion ako mogula gayud ug motanaw sa pipila ka ayroplano nga moabut. Sa paghandum ni Fred, ako magahatag kaniya sa usa ka pagsaludo, sunud-niana ako magabiya. Ako mihimo niadto sulud sa daghan, daghang katuigan. Ang paghandum subo alang kanako tungud kay wala gayuy usa ang misulti kanako sa unsay akong gisulti kaninyo karon.

Pipila kaninyo sa dili madugay gayud o sa hamubong panahon moatubang niining problemaha. Ikaw niining-tungura nakabaton sa kasayuran ug ang uban anaa ra kanimo. Wala gayuy puli alang sa imong

adlaw-adlaw nga kahibalo sa doktrina sa Bibliya. Ug pinaagi sa paggamit niana nga doktrina, ikaw makasabut gayud og ngano ang Ginoo nagapapauli sa usa-ka-tawo aron makig-uban Kaniya.

Pinaagi sa pagduko sa atong mga ulo ug pagpiyong sa atong mga mata, kita magpahinungud sa panapos nga bahin niini nga mensahe kang bisan-kinsa nga anaa dinhi nga walay Kristo, walay paglaum, ug walay kinabuhing waykatapusan. Kami buut nga ikaw masayod nga si Jesu-Kristo sa personal nga mihunahuna kanimo sa higayon nga Siya miadto sa krus, ug ang tanang sala nga imong nabuhat gayud—miagi, karon, ug umaabot—naimpyut ngadto Kaniya ug nahukman aron nga ikaw makaangkon sa waykatapusang kinabuhi. Ikaw makaangkon sa waykatapusang kinabuhi pinaagi sa usa ka walay-merito nga paagi tungud kay

ang buhat sa kaluwasan natuman ibabaw sa krus, sa higayon nga ang atong Ginoo miingon, “Kini natapos na!” Ang kaluwasan nakompleto ibabaw sa krus uban sa resulta diin kini maangkon sa matag myembro sa tawhanong kaliwat.

Si bisan-kinsa ang nagatoo diha Kaniya dili gayud malaglag, kundili makabaton og waykatapusang kinabuhi. (Juan 3:16b)

Ikaw makabaton og waykatapusang kinabuhi karon dayon. Kana ang kapilian nga bukas alang kanimo karon. Ikaw adunay praybasi sulud sa imong kalag. Praybasi nagakahulugan og kagawasan. Kagawasan nagakahulugan nga ikaw makapahayag sa imong mga kapilian sulud niining taknaa. Unsaon?

*Too diha ni Ginoong Jesu-Kristo,
ug ikaw maluwas. (Mga Buhat
16:31a)*

*Si bisan-kinsa ang nagatoo diha
Kaniya dili gayud malaglag, kundili
makabaton og waykatapusang
kinabuhi. (Juan 3:16b)*

*Tungud sa grasya kamo naluwas
pinaagi sa pagtoo; ug kana dili
gikan sa inyong-kaugalingon, ki-
ni ang gasa sa Dios; dili gikan
sa mga buhat, aron dili si bisan-
kinsang tawo magapasigarbo.
(Mga Taga-Efeso 2:8–9)*

*Karon dayon ikaw makabaton sa way-
katapusang kinabuhi. Diha sa pray-
basi sa imong kalag, pagporma sa
mga kapahayag sulud sa hunahuna
lamang, sa dimadungog, ikaw maka-
sulti sa Dios nga Amahan nga ikaw*

nagtoo diha ni Kristo, ug kana ang takna sa waykatapusang kinabuhi alang kanimo.

Siya nga nagatoo diha sa Anak [Jesu-Kristo] adunay waykatapusang kinabuhi; apan siya nga wala nagatoo dili makakaplag sa kinabuhi, apan ang kaligutgut sa Dios nagapabilin diha kaniya. (Juan 3:36)

Kini ang imong kapilian karon.

Kami mapasalamaton, Langitnong Amahan, alang sa pribilihiyo ug sa oportunidad sa pagfellowship uban sa Pulong. Unta ang Dios nga Balaang Espiritu maghimo niining mga konsepto nga makahuluganon sa higayon nga kami mag-atubang og usa sa dako-kaayong mga kasub-anan sa kinabuhi pinaagi sa kamatayon sa usa-ka-tawo

nga kami maghigugma ug magpangga. Hagita kami usab sa pagtubo uban sa grasya, sa pagbaton og espirituhanong kalig-on aron nga kami makapatigayon niining mga butanga sulud sa usa ka paagi nga nagapahimaya Kanimo. Kami mapasalamaton Kanimo alang sa pribilihiyo sa pagtoon niining mga butanga nga naghiusa. Hagita kami pinaagi kanila sa ngalan sa Hari sa mga hari ug Ginoo sa mga ginoo, gani ni Jesu-Kristo among Manluluwas. Amen.

PINANSIYAL NGA PALISIYA

Walay bayad para sa bisan unsa nga materyal gikan sa R. B. Thieme, Jr., Bible Ministries. Si kinsa kadtong nagatinguha og pagtulon-an sa Bibliya makaangkon sa among [English] mga publikasyon, DVDs, ug MP3 CDs nga walay obligasyon. Ang Dios nagasangkap og doktrina sa Bibliya. Kami manghinaot sa pagpadayag sa Iyang grasya.

Ang R. B. Thieme, Jr., Bible Ministries maoy usa ka ministeryo sa grasya ug nagalihok sa katibuk-an diha sa boluntaryong mga kontribusyon. Walay listahan sa presyo para sa bisan unsa sa among mga materyal. Walay kwarta nga gipangayo. Kon ang pagkamapasalamaton para sa Pulong sa Dios nagadasig sa usa ka magtotoo sa paghatag, siya adunay pribilihiyo sa pagpaambit ngadto sa pagpakaylap sa doktrina sa Bibliya.

SA DOKTRINA NGA MGA PAGTOON SA BIBLIYA

Doktrina sa Bibliya, ang katibuk-an sa pagtulon-an nga gikuha gikan sa usa ka literal nga interpretasyon sa mga Kasulatan, mao ang sukaranan para sa espirituhanong kamatuuran. Ang pagtoon sa Bibliya nagsangkap og espirituhanong pangpabaskog para sa Kristohanon (Mateo 4:4).

Ang kamahinungdanon sa doktrina sa Bibliya dili mahimong ibaliwala (Salmo 138:2). Ang Dios nagamando sa Kristohanon aron sa kahiladman nahiusab (Mga Taga-Roma 12:2). Kini nga pagkausab nagakinahanglan og usa ka adlaw-adlaw nga pagbag-o sa hunahuna pinaagi sa pagkat-on ug paggamit sa Pulong sa Dios (2 Mga Taga-Corinto 4:16; Mga Taga-Efeso 4:23).

Sa daghang katuigan ang sa doktrina nga Bibliya nga mga klase nga gitudlo pinaagi ni R. B. Thieme, Jr., misangkap og adlaw-adlaw nga espirituhanong pagkaon para sa iyang kongregasyon. Mga publikasyon, DVDs, ug MP3 CDs (English) maoy anaa sa walay bayad o obligasyon. Usa ka *Sa Doktrina nga mga Pagtoon sa Bibliya nga Katalogo* maoy ihatag diha sa paghangyo.

R. B. THIEME, JR., BIBLE MINISTRIES

P.O. Box 460829
HOUSTON, TEXAS 77056-8829

www.rbthieme.org
713-621-3740

MAHITUNGUD SA TAGSULAT

Si ROBERT B. THIEME, JR. (1918–2009) nagapabiling usa ka makahuluganong tingog sa Kristiyanismo sa tibuuk kalibutan. Ang iyang makugihon, mapatin-awong pagtudlo pinasikad sa orihinal nga mga lengguwahe sa Kasulatan sumala sa makasaysayanong konteksto diin ang Bibliya nahasulat. Ang iyang modernong sistema sa bokabularyo, mga ilustrasyon, ug bibliyanhong mga kategoriya sa tin-aw nagpahayag sa dimasayup nga mga kamatuuran sa Pulong sa Dios. Si Thieme nakarekord og labaw pa sa napulog-usa kalibo ka oras sa mga sermon ug nakamantala og labaw pa sa usa ka gatos ka libro nga naglukup hapit sa Bibliya.

Si Thieme migraduwar didto sa University of Arizona (Phi Beta Kappa) ug Dallas Theological Seminary (summa cum laude). Ang iyang pagtungha sa seminaryo nahunong tungud sa pagpangalagad militar sa Kalibutanong Gubat II diin siya misaka sa ranggo nga tenyente koronel sa Kwerpo sa Kasundalohan sa Kahanginan sa Estados Unidos. Sunud sa pagkatapos sa iyang padayon nga pagtungha niadtong 1950, siya nahimong pastor-magtutudlo sa Simbahan sa Berachah sa Houston, Texas. Ang iyang malukpanong pagbansay diha sa Griyego, Hebreyo, teyolohiya, kasaysayan, ug textual criticism misangkap sa pundasyon alang sa iyang masuknaong propesyonal nga kinabuhi sa pagtoon ug pagtudlo sa Pulong sa Dios. Si Thieme miretiro isip pastor sa Simbahan sa Berachah human sa singkwentay-tres katuig sa matinud-anong pagpangalagad.

